

2 KORIYN

Pol Minj Kisen Koriyn Biynimb Kuyip Tikak

Minim Nind Niņep

Koriyn biynimb nind mindrep ma giyak rek, Pol minim kilis angek, gunap nup niņep tep ma gak. Kun gek, minj biy tikiy kuyip minim kilis angak ak; angñirep giy jimñiy mindonjun angak.

Minim Ar Keykey Mindip Rek:

Minim nind angak ak mindip, chapta 1:1-11.

Pol yip Koriyn biynimb Krays ker gok yip minim ak mindip, chapta 1:12-7:16.

Jiwdiya biynimb Krays ker mindpay gok yiwan yomb mindpay ak maniy gunap yokjun angak minim ak mindip, chapta 8:1-9:15.

Pol yand bi Jiysis minim dand amemb yipund giy bap angak minim ak mindip, chapta 10:1-13:10.

Minim anğ jiwak minim day won ak mindip, chapta 13:11-14.

1 ¹Yand Pol. Gor yip angek, bi Jiysis Krays minim dand amemb ak mindiy, mam chin Timotiy yip, nimbip Gor biynimb nuk miñmon dawin yomb Koriyn, Akaya propens mangiysek mindpim rek, minj tiksipur. ²Biyomb chin apiyminay ak nimbip simb niņiy kond minder, mindrep ginimimb.

³⁻⁴Pen Biyomb chin Jiysis Krays Nop Gor nup tep anğjun. Nuk chinup simb niņiy, ñin yikop gok kond mindrep giy, miker gunap apamb kond mindrep giy gip ak mey, chin pen andikiy, biynimb gunap kuyip miker apamb, kond mindrep gipun. ⁵Krays miker dek, nup ker mindpun rek, chin kunep dipun. Pen miker kun gok yikop gip, nuk yip nep mindeniņgambun ak niņiy, gos sek mindpun. ⁶Gip kun ak, Gor nuk nep gek gip ak mey, nimb chin gipun rek niņiy, miker apek, gos sek mindiy nup ma kirgiy mey, perper mindeniņgambim. ⁷Pen nimb Gor ker

mindeningambim akan anggiy, gos ak ma niḡbun. Gos chin niḡbun ak; nimb chin gipun rek, yip miker diyinḡ mindpim ak mey, chin yip gos sek mindeningambun.

⁸Pen mam ay sikop. Chin Esiya propens mindiy, miker yomb diy, gos tikek apek kumjun rek ayak ak, sakiy ma ginimimb. ⁹Pen gak ar kun ak, gos yomb yimb owak ak mey; chin key kilis mindpun anggiy ma apun; Biyomb biynimb kumbay gok kuyip gamb tikjakpay anep chinup kond mindakniḡ, mindpun apun. ¹⁰⁻¹¹Chinup pikayniḡgiy rek ayek, kim dak kun ak, kisen kunep giningamb. Kun ak nup anḡniḡ mindem, ar kun anep ginimuḡ. Pen nimb biynimb kuḡaynep Gor nup anḡniḡem, chinup kim diniḡgamb rek, biynimb kuḡaynep niḡiy nup yimb dand araniḡgambim.

Pol Kuyip Ma Am Niḡak Minim Ak Anḡak

¹²Chinup tep gip ak, Gor chinup kond mindakniḡ, timey ma gipun. Nimbip akan, biynimb gunap kuyip timey giy akan, minim yesek anggiy ma gipun. Pen chin key mindrep ma gipun; Gor chinup simb niḡiy diy, gos ḡamb, mindrep gipun. ¹³Pen minj nimbip tikpun gok, minim bak okok rek anggiy ma tikpun; riyt giy, miseḡ yimb niḡniḡgiy anggiy tikpun. ¹⁴Miḡiy keykey rek mindpun ak pen, chinup tep giningamb ak; chinup niḡrep gem mey, Biyomb chin Jiysis winiḡgamb ḡin ak nan-giy, chin nimbip niḡon tep giningamb; nimb pen chinup niḡem tep giningamb. ¹⁵⁻¹⁶Kun anep mey, Masedoniya ma amnik ḡin ak, gos bap niḡiy anḡnik, “Yand Masedoniya biynimb kuyip minim anḡniḡ, am nimbip niḡiy amnim; pen andkind apiy Jiwdiya amniḡ, kinjeḡ par nokom kun anep apiy, nimbip tip ak niḡyiḡ, apiy pandiknim. Kun gen mey, nimb niḡem tep gakniḡ, yip pen keḡmaḡgiy gunap ḡem ḡimbyiḡ, Jiwdiya amnim anḡnik.” ¹⁷Gos kun ak niḡiy mey, nimbip minim piḡiy yoknik ak pen, kisen ma ninik. Ginik kun ak, yip pen anḡniḡgambim, “Bi par ak nup key tep gip ar ak kindik giy, giniḡayn giniḡayn anggiy, minim anep anḡip anḡniḡgambim.” Yip bi minim ḡiḡ nep pikraḡip anḡnimimb rek ayip ak pen; ¹⁸yand Gor Biyomb niḡind yimb anḡip ak ker mindpiyn rek, yergiḡ monmon ginim. ¹⁹Salas, Timotiy, chin yakam nimbip Gor Niḡuk Jiysis Krays nup minim anḡḡinuk rek, nup niḡbim; nuk bi minim ḡiḡ pikep bap ma mindip. Nuk yaw anggiy, kisen pen mer ma anḡip. Minim yerip anḡip ak, anḡip rek nep gip. ²⁰Nop minim nuk yerip yerip anḡak ak, Niḡuk Jiysis Krays apiy, maḡgiysek gip. Gip kun ak niḡiy, Gor nup tep anggiy, yimb dand aranimbun. ²¹Nuk nep gek, chin kamb sek Krays nup chingrep gipun. Nuk nep mey, chinup biynimb yand key yimb anggiy, ²²pisnep diniḡgamb rek Kawnan nuk ak yokek, ap chinup bak ayek mindpun. Kun gek mey, chinup anḡak anḡak rek maḡgiysek giniḡgamb anggiy niḡrep gipun.

²³Yand nimb Koriyn kay mindenimbik ak nining genik ak pen, kayan ak amiy minim yomb angen, kosyam mindenimimb rek ayek niñiy, nimbip simb niñiy ma ninik. Gor nuk niñimb; yesek ma aspiyn. ²⁴Pen minim yip anep kindik giningambim angyiy gos ak ma niñbiyn. Nimb key Krays nup gosimb niñiy, nup chingiy mindpim ak mey, yand am minim gunap sek angen, niñrep giy tep gakniñ mindeningambim angyiy apiyn.

2 ¹Pen yand gos bap niñiy angnik, “Tip ak am kuyip niñiy, minim kilis angen, kuyip simb ginimuñ rek ayip ak; ma amnim angnik.” ²Pen nimbip gen simb gek, an pen mindiy yip geningamb miñmiñ giningayn? Biynimb kun ak rek bap ma mindeningambay. ³Kun ak niñiy mey, nimbip minj tiknik. Amjakiy nimbip niñen, yip tep giningamb biynimb gok, niñen simb giningamb ak, tep ma giningamb angnik. Yenen, yand niñbiyn: yip simb gek, nimbip simb giningamb; yip tep gek, nimbip tep giningamb. ⁴Minj tiknik kun ak, mindmangyiy yip ak piñiyñiy ayek, gos par aying, siy ñiñg tikyokiyng tiknik. Nimbip miker yomb ginimuñ angyiy ma tiknik; nimbip wasemb yimb apiyn ak niñnimimb angyiy tiknik.

Bi Tap Timey Gak Anup Niñiy Kirginimimb

⁵Yand niñen, bi gek miker yimb gak ak; yip ma gak, nimbip gak. ⁶Pen nimb mangyisek rek nup kirpik ak; miñiy kun ma ginimimb. ⁷Miñiy timey gak kun ak niñiy kirgyiy, nup minim sayn angnimimb. Yenen: kun ma gem, simb gek apyap piknimuñ rek ayip. ⁸Kun ak nup wasemb aypun ak angem, nuk niñrep ginimuñ. ⁹Nimbip minj tiknik ak; nimb key minim kun ak tungasikrep giy, mindrep giningambim akan angyiy, tiknik. ¹⁰Pen biynimb nimb kayan okok timey gey, minim yand rek, akniy niñiy kirginim. Minim kun ak nimbik key ak mey, kuyip niñiy kirginimimb. Pen minim yip rek gunap mindonimuñ; akniy angem apek, Krays yip niñmindip rek, niñiy kirginim. ¹¹Pen kilis giy, niñiy ma kirgoningambun, Seytan chinup gek, apyap pikjun rek ayip. Seytan per gen apyap pikniñgyiy angyiy niñimb ak niñbun.

¹²Pen Krays minim tep ak, Trowas biynimb kuyip angniy angyiy, Trowas amenik, Krays yip kinjeñ yomek, woñg nup ak miñmon kun ak ginim rek ayak ak pen; ¹³mam Taytas, nimb Koriyn kay yerer giy rek mindenimbik minim ak ma dand apek, gos yomb kun ak niñiy, Trowas biynimb kuyip nimb mindem angyiy, nup niñning miñmon Masedoniya amnik.

¹⁴Kun ak Gor gip rek niñiy, nup tep yimb apiyn. Ñinuk Krays nup yokek, ap Seytan nup di talak miñgan nuk okok ay chinup dak. Diy, biynimb yip gosimb niñbay guniy kuyip, dam Bapiy nup opriyñ kuyrep wip rek bap ñinim angyiy, chinup dand namb amnakniñ, biynimb kim amningambay gok sek, kurginingambay gok sek kuy kun ak niñbay. ¹⁵⁻¹⁶Biynimb Krays kasin giy kim disap gok; kuy kun ak niñiy, kuyrep

perper mindonjun ak wip angyi, minim chinup ak dipay. Pen biynimb Gor nup ma diy, pisnep chip tikniᅅ gipay gok nep; kuy nokom kun anep niᅅiy, ak chip kuy rek wip angyi kirpay. Kun gip kun ak, minim tep ak ñiñloᅅ ayep ker mer: niᅅrep giy aᅅᅅñemb. ¹⁷Chin biynimb kuᅅaynep Gor minim aᅅᅅñiyiᅅ, maniy tap gok diniᅅgambun angyi aᅅᅅñimbay rek, ma gipun. Krays yip mindiy, Nop niᅅmindakniᅅ, minim yipund giy ak nep aᅅᅅñimbun.

3 ¹Pen minim aspun kun biy aᅅᅅñirep gipun rek, kuyip aᅅᅅon chinup diniᅅgiy angyi ma aspun. Chin biynimb nimb ma niᅅbim gunap rek kun gipnup. Pen biynimb gunap chinup ma niᅅey nimbip angyi minj tikñem, dam kuyip ñimbunup. ²Pen minj chin rek mey, nimb mindpim. Gos chin niᅅbun ak; nimbip minim aᅅᅅñon niᅅiy dipim ak mey; biynimb okok nimbip niᅅiy, chinup bi yerip rek ak niᅅbay. ³Minj kun ak, tap ñiwkil gep ak diy, kamb pis band ar ak tikpay rek ma aspiyn. Minj kun ak Krays nup woᅅᅅ gonuk, nuk key Gor Kawnan anup aᅅᅅek, minim tep nuk ak gosimb nimbip namb ak tikak.

⁴Pen minim aᅅᅅñirep gipun rek aspun kun ak, Nop Gor mindakniᅅ, Ñinuk Krays gak ar ak aspun. ⁵Chin key gon amnimuᅅ rek ma ayip; Gor nep mey chinup kond mindakniᅅ gon amimb. ⁶Nuk nep gek, chin bi woᅅᅅ tep nup gipun gok mindiy, minim kisen giniᅅᅅayn angyi aᅅᅅayak ak, dand amiy, biynimb gok kuyip aᅅᅅñimbun. Minim aᅅᅅayak kun ak, low minim kamb pis ar ak tik ayek per apay ak mer; Kawnan nuk anep aᅅᅅak. Low minim ar ak giy kumniᅅgambun, pen Kawnan nuk gos ñakniᅅ gon amek, perper mindeniᅅgambun.

⁷Low minim kun ak, Gor kamb pis band ar ak tikek, Mosis dand owakniᅅ, melik tep yimb ak gek, Yisrel biynimb Mosis nup niᅅniᅅgiy rek ma ayak. ⁸Pen Gor Kawnan gip ar ak, biynimb kuyip aᅅᅅñon, minim kun ak dey, nuk kuyip key yimb gek, melik tep Mosis nup gak ak tap yikop rek ayip. ⁹Kor niᅅniᅅᅅgambay low minim ak chinup yokniᅅ, key yimb gakniᅅ yokak ak; niᅅind suᅅ-tep mindeniᅅgambun minim ak yokek apek niᅅnukniᅅ, chinup key yimb gip. ¹⁰Mosis low minim aᅅᅅñak ñin kun ak, melik yomb gak ak pen; minim nuk kisenimb ak sup melik rek pikmindakniᅅ, nindnimb ak melik ma mindip rek ayip. ¹¹Minim per ma mindonimuᅅ ak, kilis yip niᅅyaᅅ angyi yokak ak; minim nuk perper mindeniᅅᅅgamb ak aᅅᅅñinukniᅅ, niᅅind key yimb ar ak gip.

¹²Kun ak chinup direp giniᅅᅅgamb rek niᅅiy, minim tep nup ak aᅅᅅñiniᅅᅅ ñawil ma diy, monmon aᅅᅅñimbun. ¹³Mosis gak rek ma gipun. Nuk low minim ak aᅅᅅñakniᅅ, jomluk nuk ak melik yimb giy, pen yep won bap mindiy, sikoy gek wakniᅅ, gisap kun ak ma niᅅniᅅgiy angyi, wandbis band ak di jomluk yiwgak. ¹⁴⁻¹⁵Pen Mosis nup nep ma gak, Jiwda biynimb gok kunep wandbis band rek, gos timund kuyip kom kom giy mindakniᅅ, gos yipund giy niᅅniᅅgiy rek ma ayak. Gor

minim nuk nind giningayn angyi angyek tikyak ak riyt giyakniŋ, minim aspay mey ak angyi ma niŋyak. Miñiy kunep riyt gey niŋiy, ma niŋbay. ¹⁶Pen Biyomb ak nup gosimb niŋey, nuk gek gos kuyip paŋgyikek, angak angak rek niŋniŋgambay. ¹⁷Biyomb chin ak nuk Kawnan ak mey, chin yip mindakniŋ, miker kuyip gip kun ak rek ma gip. ¹⁸Biyomb ker mindpun rek, gos chin ak yipund giy amek, melik nuk ak chinup niŋimb. Niŋakniŋ, galas asdal ak gip rek, Kawnan nuk sek mindon biynimb gok niŋiy, nup ker mindpun ak niŋbay. Pen melik nuk ak chinup niŋakniŋ, nuk mindip rek mindon amjap.

Chin Yikop Man Tiyn Rek Mindpun

4 ¹Gor key chinup simb niŋiy diy, woŋg kun biy angyek gipun ak; gos miker gunap ma niŋbun. ²Weygiy gipay ar ak sek, nambinŋ gakiŋ gipay ar ak sek ma gipun. Gor minim anŋniŋiŋ; minim chin key gunap sesek angun angyi ma apun. Yerer gipun gok yesek ar ak ma gipun. Biynimb gok chinup niŋiy, yipund giy nep gon amjap ak niŋniŋgiy angyi, Gor chinup niŋmindakniŋ, minim nup ak yipund giy nep anŋniŋimbun. ³Minim kun ak biynimb ma niŋun apay gok nep, ma niŋiy, miñmon timey ak amniŋ gispay. ⁴Gor nup gosimb ma niŋiy, Seytan nup biyomb chin angyey, windin kuyip ak koy gek, Krays melik tep minim ak ma niŋiy, nuk Nop Gor rek mindip ak ma niŋiy, gipay. ⁵Pen minim chin key ma anŋniŋimbun; Biyomb chin mey Krays nep angyi, beŋ nup okok mindiy, nimbip direp gipun. ⁶Nind kisyimnamb okok, Gor melik gaŋ angyek, day melik gak. Gak kun ak rek, namb chinup biyaŋ melik tep nuk ak, gaŋ angyek gip ak mey; miñiy biynimb gok chinup niŋiy, Jiysis Krays melik tep ak niŋbay.

⁷Chin biynimb yikop man tiyn rek ak pen, Gor gek melik tep diy mindpun ak; kilis chin key mer; Gor kilis diy kun giy mindpun ak niŋbay. Miker keykey apiy, ⁸chinup aybirikniŋ rek gip ak pen, siliŋ ay ambun. Kinjeŋ chin amemb ak ma mindek, yerginjun angyi niŋmindon, kinjeŋ miŋgan nokom bap yikek, amiŋ kim ambun. ⁹Chinup yukpay ak pen, Gor chinup ma kirgip. Chinup pikayon kumyaŋ angyi pikpay ak pen, gamb nep pikpay. ¹⁰Jiysis nup pikyakniŋ, gos kuŋay ma niŋak rek, chinup kunep giyakniŋ, gos kuŋay ma niŋbun ak mey, nup ker mindpun ak miseŋ niŋbay. ¹¹Kun ak lum ar biy mindnukniŋ, Jiysis ker mindpay angyi chinup pikayniŋ nep gipay. Pen gipay kun ak, biynimb gok Jiysis yip mindpun ak niŋrep giy, gunap nup dipay. ¹²Kun ak chinup minek minek kumemb rek ayip ak, nimb gunap minim tep ak niŋiy, perper mindeniŋgambim.

¹³Baybol buk ak tikiy angyak, “Gor nup gosimb niŋbiyn rek kun angnik angyak.” Kun ak rek, chin kunep nup gosimb niŋiy, minim anŋniŋimbun. ¹⁴Gor Niŋuk Jiysis nup gek tip tikjakak rek, chinup kunep

gek tikjakoningambun; dam ñiying, biynimb nip guniy angningamb.
 15Kun ak miker diyiny; kosyam mindyiny gipun kun ak, nimbip nen kun gipun. Kun gon mey, biynimb kuñaynep minim nup ak diyiny; Gor nup tep anggyiny giyakniñ, yimb nup ak yiy ar biyon araniyngamb.

Nup Gosimb Niñiy Gos Sek Mindpun

16Kun ak ñin tomb chin sayn giyownimuñ rek ayip ak pen; Gor chinup minek minek kilis ñakniñ mindpun ak, gos yomb kun ak ma niñbun.
 17Miker keykey dipun kun gok tap yomb mer; yikop won bap nep chinup giniyngamb. Pen am nuk yip mindiy, perper mindrep giniyngambun. 18Lum ar biy mindiy, mindrep gun anggyi ma niñbun: am Gor yip mindiy, perper mindrep ginjun anggyi niñbun.

5 1Chin niñbun: mumbwak chin miñiy mindip biy, korip bandak band rek mindip. Pen korip kun ak tuñgwaniñgey akañ, wor ay yapek, Gor korip chinup kisenimb perper mindeniñgamb bap gayeniñgamb, nuk yip per mindoniñgambun miñmon nuk biyoñ. 2Korip kisenimb kun ak, chech rek ayjun anggyi, miker gakniñ kond mindpun. 3Chinup chech rek ayñeniñgamb mey; daynep ma mindeniñgambun. 4Mumbwak nindnimb ak sek mindiy, miker gakniñ mindpun ak pen; kirgiy, yikop mindonjun anggyi ma niñbun: semb biyoñ perper mindeniñgamb mumbwak ak dinjun anggyi niñbun. 5Gor nuk key mumbwak kisenimb diniñgyi anggyi, Kawnan nuk anup yokek apek yip mindpun ak mey; tap gunap angak gok, angak rek giniyngamb ak niñrep gipun.

6Kun ak per gos sek kond mindpun. Mumbwak nindnimb ak sek mindiy mey, Biyomb chin ak yip ma mindpun. 7Miñiy nup chingiy gosimb niñyiny mindpun ak pen, windin ma niñbun. 8Chinup giniyngamb rek niñiy, tep gip ak mey; mumbwak nindnimb ak kirgiy, mumbwak kisenimb ak diy, am korip miñmon chin yimb biyoñ mindonjun anggyi niñbun.

9Kun ak gos yomb chin ak mey; biy mindiy akañ, am nuk yip mindiy, nup tep ginimuñ ar ak nep ginjun. 10Yenen: chin mañgyisek am Krays windin yirik ar ak amon, mumbwak biy mindiy tep gipun akañ yergiy rek gipun ak niñiy, pen kun ak rek ñiniñgamb.

Miñiy Gor Yip Jimñiy Mindonjun Rek Ayip

11Biyomb chin ak, Bi jel gip ak niñiy, biynimb gok kuyip minim angñirep gipun. Chin bi yerip rek mindpun ak, Gor niñrep gip; nimb kunep yip niñbim rek ayip. 12-13Pen gos chin niñbun ak; nimb chinup bi yerip rek ak niñrep giy mey, biynimb yimb kiyk key dand araniy mindrep ma gipay gok yip, penpen ang amiñ apiy ginimimb rek ayiniñgamb. Pen minim apun kun ak, nimb angningambim; sakiy ayek, yimb kiyk key dand araniyng aspai angningambim ak pen, ak mer. Chin aspun

ak; nimb minim kuyip ak kirgiy, minim chin apun ak diy mey, Gor nup minim ak niṅrep giy, yimb nup dand aranimimb aṅgiy aspun. ¹⁴Krays chinup wasemb ay kumek mey; gos chin ar ak key niṅiy ma gipun. Bi nokom yimb ak chinup nen kumak rek, chin maṅgiysek yip kumnuk rek ayip. ¹⁵Kun ak miṅiy tikiy, mindmaṅgiy chin lim giniṅgamb ar ak ma giy, chinup key tep giniṅgamb ar ak niṅiy ma ginjun; Biyomb chinup aṅgiy kumiy tip tikjakak ak, niṅek tep giniṅgamb ar ak nep ginjun.

¹⁶⁻¹⁷Biyimb Krays nup chiṅgipay gok, nind mindyṅgipay rek ma mindpay; kim kisenimb ar ak mindpay. Kun ak biyimb yikop gok gos niṅbay rek niṅiy; biyimb gok tep, biyimb gok timey aṅgiy ma niṅjun. Krays nup nind gos yesek ar kun ak rek nep niṅnuk ak pen, miṅiy niṅbun: nuk bi tep yimb mindip.

¹⁸Chin kim kisenimb mindpun kun ak, Gor nuk nep gek mindpun. Nind biyimb ṅaṅep nuk mindonuk ak pen, kisen ṅinuk Krays nup yokek apiy, chinup di Nop Gor yip jimṅiy ay, biyimb gunap sek yand yip jimṅiy mindeniṅgiy aṅgiy, chinup woṅg nuk ak aṅgayek gipun.

¹⁹Biyimb gok yand yip jimṅiy mindeniṅgiy aṅgiy, chinup aṅgayek mey, biyimb gok kuyip apun, “Gor ṅinuk Krays nup chinup nen aṅgiy, aṅgek apiy kumak ak mey; timey gipun ak niṅiy kirgiy, chinup biyimb miṅmon keykey mindpun rek disap. Kun ak nup ker apem nimbip dek, nimb kunep nuk yip jimṅiy mindeniṅgambim apun.”

²⁰Chin mey, bi namb nimb; Gor minim nup ak niṅiy, nimbip aṅṅimbun. Minim nimbip nembnemb giy rek aspun ak, Gor minim nuk key chinup yokip ak aspun. Kun ak nimb nup ker apiy, nuk yip jimṅiy mindenimimb. ²¹Pen tap siy tap timey gach ak chinup biyimb maṅgiysek chiṅg dek, Gor yip jimṅiy mindep rek ma ayek, ṅinuk tap siy tap timey bap ma gak ak yokek apiy, tip chinup ak diy kumek mey; nup chiṅgipun rek, Gor biyimb suṅ-tep yand aṅgip.

6 ¹Kun ak Gor yip jimṅiy woṅg gipun rek, nimbip minim kilis giy aṅgiy aspun: Gor nimbip simb niṅiy, Krays nup yokek apiy dak ak mey, nup ma kirginimimb aspun. ²Gor aṅgak:

“Minim kun ak rek niṅnim aṅgiy mindenik ṅin ak, yip aṅgniṅenak niṅnik. Nip dinim aṅgiy mindenik ṅin ak mey, nip dinik aṅgak.” Kun aṅgak ak niṅbun; miṅiy ṅin biy Gor chinup simb niṅiy diniṅgamb. Miṅiy ṅin biy nup chiṅgiy mey, kim amniṅgambun.

³Nup woṅg giṅimbun ak amrep ginimuoṅ aṅgiy, niṅrep giyṅg gipun. Biyimb gunap niṅiy gos gunap apek, apyap pikniṅgambay ar ak ma gipun.

⁴Pen yerer gipun ak, Gor nup woṅg gispun ak niṅniṅgiy aṅgiy, miṅ tep ar ak nep gipun. Kun ak woṅg nup ak ma kirpun. Miker diy, kosyam mindiy akaṅ, yerer gek; gos kun ak ma niṅbun. ⁵Chinup ṅin gunap tapin pikpay; ṅin gunap kalambis aypay; ṅin gunap kinrep ma gipun; ṅin gunap yiwan kinbun. ⁶Pen mindrep giy; niṅrep giy; miluk ma niṅiy; biyimb direp giy;

Gor kawnan yip mindiy; biynimb wasemb yimb ay, ⁷minim niḡind yimb nep aḡiy, Gor kilis ḡakniḡ woḡg gipun rek; woḡg nup gipun ak niḡniḡ niḡniḡgambay. Chin Gor bi suḡ-tep nuk ak mey, chim kandiḡ tap gok ḡin pis pis ḡakniḡ, Seytan yip penpen gipun. ⁸Biynimb gunap yimb chinup dand aranimbay; gunap dand apyowpay. Gunap chinup minim tep apay; gunap minim timey apay. Chinup bi yesek aḡgep aḡgiy niḡbay ak pen, chin bi minim niḡind nep apun. ⁹Chinup ma niḡbun apay ak pen; niḡrep gipay. Kumbun rek ayip ak pen; kim mindpun. Tapin pikpay ak pen; ma kumbun. ¹⁰Miker yomb gip ak pen; tep gakniḡ mindpun. Simbgeprek mindpun ak pen; chin gipun rek, biynimb kuḡaynep mindrep gipay. Tap ma mindip gok mindpun ak pen; Gor chinup kond mindakniḡ, mindrep giyiḡg gon amjap.

¹¹Koriyn biynimb. Nimbip mindmaḡgiy aypun rek, minim gunap weygiy ma aspun, misen yimb aspun. ¹²Nimbip mindmaḡgiy aynuk ak, kun giy nep mindip ak pen; chinup mindmaḡgiy ayiḡgipim miḡ ak dam akay yokpim. ¹³Chinup ma kirginimimb; nimbip gipun rek, chinup mindmaḡgiy aynimimb. Nimbip niḡen ḡapan yand rek ayek kun aspiyn.

Biynimb Gor Ker Ma Mindpay Gok Yip Ma Yiḡgong Ginimimb

¹⁴Biynimb Gor nup gosimb niḡbay gok, biynimb yikop gok yip minim aḡg ar nokom ay, gey amnimuḡ rek ma ayip. Biynimb mind tep gipay gok, yergiy biynimb mindrep ma gipay gok yip, jimiḡiy gey amek tep giniḡgamb? Pen biynimb melik pis okok mindpay gok, yergiy biynimb kisyim pis okok mindpay gok yip, jimiḡiy mindeniḡgambay. ¹⁵⁻¹⁶Krays yip, Seytan yip minim aḡg ar nokom ma ayniḡgayr. Biynimb Gor ker mindpay gok yip, biynimb yikop gok yip, gos ar nokom ma niḡniḡgambay. Chin biynimb nup ker mindpun gok, korip mindep nuk ak mindpun. Pen chin Gor korip mindpun gok sek, tap yikop aḡgniḡbay korip mindpay gok sek minim bap aḡg ar nokom ay, gon amnimuḡ rek ma ayip. Gor nuk key aḡgak,

“Yand namb kuyip okok mindiy, Biyomb kiyk ak minden, kiyk pen biynimb yand mindeniḡgambay aḡgak.”

¹⁷Kun ak nuk aḡgip, “Kuyip kirgiy keynep mindiy, mindrep ginimimb. Tap asiḡ gok ma wilikem, nimbip diniḡgayn. ¹⁸Den mey, Nap nimbik yand minden; nimb ḡi paḡ yand gok mindeniḡgambim aḡgip.” Biyomb gin yimb ak kun aḡgip.

7 ¹Buḡgiy tep yand gok. Gor chinup giniḡgayn aḡgiy minim aḡgayak kun ak, nup aḡgniḡon; timey gipun gach ak sek, gos timey niḡbun gach ak sek wiykyokek, nup pirikiy tap asiḡ gok pisnep kirgiy, biynimb suḡ-tep nuk gok mindenjun.

Pol Miḡmiḡ Gak

²Chin biynimb nimbip bap, yesek aḡgiy, timey giy akaḡ, monmon giy ma ginuk. Kun ak chinup wasemb aynimimb. ³Nimbip aḡg sikoy giniḡ

ma aspiyn; nind angnik rek, nimbip niĵen tep gip rek, jimñiy mindpun. Kim mindiy akan, kumningambun ak, jimñiy nep mindeningambun.

⁴Nimbip gos gunap ma niĵbiyn, tep gakniĵ mindpiyn. Chinup miker yimb gisap ak pen, miñmiñ giyiĵ mindpiyn.

⁵Pen chin miñmon Masedoniya amjaknuk ñin ak, won bap yikop ma mindonuk: miker keykey mindiy, penpen ar keykey anĵeyak, gos yomb ak niĵnuk. ⁶Pen Gor bi tep biynimb direp gip ak, Taytas nup yokek apek, yip tep yimb gak. ⁷Nuk biy apiy, nup yerer gipik ak sek, gosimb yip niĵiy simb gakniĵ kond mindenbik minim ak sek anĵek, yip tep yimb gak.

⁸Minj tiknik ak niĵem, nimbip simb yimb gak ak pen; yand gos yomb kun ak ma niĵbiyn. Minim kilis anĵiy tiknik kun ak niĵem, simb gak ak pen; ak yikop won nokom bap nep gak. ⁹Kisen mey, namb chin biy miñ timey ar ak ma ginjun anĵiy kirpik ak, yip tep gip. Yand niĵbiyn: nimbip simb gak kun ak, Gor ginimuĵ anĵiy niĵak rek nep gak ak mey; minj tiknik kun ak, niĵind kun giy tiknik. ¹⁰Biynimb miñ timey ar ak giy, “Gor nup yenen kun gipun anĵiy” kirpay gok, nuk yip mindiy kim mindeningambay. Pen biynimb Gor nup gosimb ma niĵiy yikop nep simb giniĵgamb gok, yergiy kim amningambay? ¹¹Pen nimbip simb gak kun ak, Gor gek gos niĵrep giy apik, “Pol nup direp ginjun. Namb chin biy yenen monmon gispay? Chin timey ma gipun ak, biynimb gok niĵrep giyaĵ anĵiy apik.” Kun ak minim anĵ ar nokom ay, bi timey gak anup gos ñinjun anĵiy gispim. Kun ak tep yimb gispim. ¹²Nimbip minj tikyoknik ak, bi tap siy tap timey gak anep akan, binuk monmon gak anup anĵiy ma tiknik; nimbip gos niĵiy, Gor niĵmindakniĵ, chinup direp gipim rek, key niĵrep ginimimb anĵiy tiknik. ¹³Pen minj kun ak niĵiy, chinup direp yimb gipim ak mey, tep gip.

Pen Taytas nimbip am niĵiy apiy kesim dek, nup tep yimb gak rek chinup kunep gak. Nup direp gipik ak mey, miñiy gos yomb ma niĵimb. ¹⁴Nup direp giniĵgambim anĵnuk rek nep gipik ak mey; chinup nambiĵ ma gisap. Minim nimbip apun gok, per niĵind gok nep apun rek, minim nup anĵnuk ak, kunep niĵind yimb nep anĵnuk. ¹⁵Pen Taytas am nimbip minim anĵek, nimb jep diyiĵ minim kun ak diy, nup direp gipik ak; nimbip niĵek tep yimb gip. ¹⁶Pen miñiy niĵrep gipiyn: nimb ar bap key ma giniĵgambim; mindrep giniĵgambim. Kun ak yip key tep yimb gip.

Masedoniya Biynimb Opriyĵ Yomb Yomb Rek Ñiyak

8 ¹⁻²Pen mam ay sikop. Biynimb Krays ker Masedoniya propens mindipay gok, tap kiyk kuĵay ma mindek, kosyam mindeyak ak pen; Gor kuyip gos tep ñek, opriyĵ monmon ñiyak. ³Maniy kiyk kuĵay ma mindek ak pen; ñiniĵgiy rek namb ak kirgiy yomb yomb ñiyak. Gos kiyk key niĵiy, ⁴chinup nembnemb giy, Jiwdiya biynimb Gor ker mindiy, yiwan yomb gek yikop mindipay gok kuyip, maniy ñinjun anĵiy ñiyak.

⁵Pen giyak kun ak, giningiy angnuk rek nep ma giyak. Gor giningiy angip rek nup di nind ay, chinup bi wong nup gipun gok sek direp giying, opriyn kun ak niyak. ⁶Pen Taytas nind am nimbip anggek, nimb kunep opriyn nining gembik rek, nup apiyn, “Am kuyip kond mindenimin; opriyn di nan-gining gispay kun ak nan-giningiy apiyn.” ⁷Nimb mey, Gor nup gos niñrep giy, minim niñrep giy, biyimb angñirep giy, biynimb direp giy, chinup wasemb ay gipim ak; miñiy Gor nup direp gun angiy niñbim rek, Jiwdiya biynimb gok kuyip simb niñiy, tap opriyn ak monmon ñinimimb.

⁸Pen nimbip nembnemb giy ma aspiyn. Gor nup wasemb yimb aypim akañ angiy, biynimb gunap tep gakniñ gispay rek aspiyn. ⁹Krays chinup simb niñiy gak rek niñbim. Miñmon nuk ak mindiy, mindrep gak ak pen, nimbip angiy mindrep gak kun ak kirgiy, biy apiy bi yimgeprek yimb ak mindek. Kun gak rek, nimb mindrep gep ak dipim. ¹⁰Simiy nind ak, nimb gos tep niñiy, Jiwdiya kay kuyip opriyn ñinjun apik. Kun ak nimbip aspiyn; ¹¹tap mindonimuñ gok bilok ay, kuyip ñemb rek ak miñiy pisnep ñinimimb. ¹²Gor nup tep gip ak, opriyn monmon ñinjun. Pen monmon ñinjun angiy, siskoy nep ñemb rek ayek, gos yomb ma niñjun. Gor tap chin mindip gok nep ñin pañgningamb; ma mindip gok sek ma ñin pañgningamb.

¹³Biynimb maniy niningambim gok mindrep gey; nimb pen kosyam mindenimimb angiy, ma aspiyn. ¹⁴Tap nimb mindip rek, kuyip gunap bilok ñem mey; kisen tikdinimuñ ñin ak, nimbip pen niningiy. Kun giy, kiy yip andip andip rek mindeningambim. ¹⁵Baybol buk ak tikiy angyak: “Biynimb tap mana apay ak kuñaynep yiprunğ diyak gok niñey, yomb rek ma ayek; key niñningiy rek ak nep mindek. Pen biynimb sikoy rek diyak gok kuyip kunep, ma tikdak angyak.”

Taytas Nup Miñmon Koriyn Yokak

¹⁶Gor Taytas nup gos tep ñek, yand nimbip direp ginim angiy niñbiyn rek nep niñimb ak; Gor nup tep aspiyn. ¹⁷Taytas am kuyip niñiy owan angen, nup key tep gip rek, nimbip ker jap. ¹⁸Pen bi tep chin bap sek, Taytas yip yoksipun. Bi kun ak nuk minim tep wong ak giy, miñmon sikoy keykey okok angñirangakniñ, nup tep yimb apay. ¹⁹Nup angyak chinup kondey, opriyn maniy di nan-giningambay gok dand Jerusalem amiy, biynimb simbgeprek gok kuyip ñon mey, Gor nup yimb ak araningamb. ²⁰Pen opriyn yomb kun gok niñrep giy ma dand amoningambun; ayrep giy ma dand ambay angningiy rek ayip. ²¹Bi maniy siydep rek ma mindpun ak Gor niñimb; pen niñrep giy dand amon, biynimb gok kunep niñningambay.

²²Pen mam chin bap sek yoksipun. Nup per tep gakniñ wong gip ak, niñrep gipun. Nimbip gos niñimb ak mey, tep yimb gakniñ jap.

23 Bungiy Taytas nup yoksipun ak, yand yip woŋg jimñiy giy, nimbip minim aŋgñirapur. Pen binuk yip japiyr omiŋal ak, Krays nup yimb dand aranimbiyr rek, Krays biynimb nuk Masedoniya propens namb okok woŋg kun ak aŋgayey, yip japiyr. 24 Pen kayañ ak amjakey, kuyip wasemb yimb ay direp ginimimb. Kun gem mey, minim kun ak yomb amek, biynimb Gor ker mindpay miñmon keykey okok niŋiy aŋgningambay, “Pol Koriyn biynimb Gor ker mindpay gok kuyip, yimb dek aranimb ak, niŋind nep gip aŋgningambay.”

Biynimb Gor Ker Mindpay Gok Direp Ginimimb

9 1 Pen biynimb Gor ker mindpay gok direp ginimimb aspiyn minim ak, nimb key niŋrep gipim. 2 Nimb Akaya propens mindpim gok, simiy nind ak, opriyŋ kun ak gos key niŋiy ñining gembik; yand am biynimb Masedoniya propens mindpay okok kuyip, aŋgenik niŋiy; miñiy biynimb kuŋaynep opriyŋ ñispay. 3 Pen mam gunap kuyip nimbip nind yoksipiyn ak; opriyŋ dayrep gem mey, Masedoniya kay kuyip aŋgnik ak, minim nep aŋgip aŋgiy ma niŋningiy. 4 Pen maniy ma nan-geniŋgambim; Masedoniya biynimb gunap poŋind amjaken, minim nep aŋgnik rek, chinup nambiŋ giniŋgamb. Nimbip kunep ginimuŋ rek ayip. 5 Kun ak mam chin gok kuyip nind aŋgyoksipiyn. Kiyk am nimb yip mindiy, maniy ñiningambun apik ak, nan-gem mindonimuŋ. Kisen yand Masedoniya biynimb gunap yip amjakiy, gos nimb key niŋiy opriyŋ ñimbim ak niŋrep giniŋgambay.

6 Nimb niŋbim: biynimb tap yiŋ kuŋay ma yimbay gok, tap kuŋay ma mindeniŋgamb; biynimb tap yiŋ kuŋay yimbay gok nep, tap kuŋaynep mindeniŋgamb. 7 Kun ak nimb biynimb nokom nokom mindpim rek, gos key niŋiy opriyŋ ñinimimb. Yiruk gakniŋ ma ñinimimb. Biynimb gunap nimbip nembnemb gey niŋiy, ma ñinimimb. Key niŋbim rek, tep gakniŋ ñinimimb. 8 Pen Gor Biyomb mindip ak nimbip bilesiyŋ ñining, tap tikdiniŋgamb rek nep ma ñiniŋgamb; gos nuk key niŋiy, tapin ñinimuŋ rek mindip. Kun ak mey tap nimb kuŋaynep mindakniŋ, woŋg tep nup ar keykey minek minek ginimimb rek ayiniŋgamb. 9 Minim kun ak rek, Baybol buk ak tikiy aŋgyak:

“Biynimb an biynimb simbgeprek gok kuyip, tap monmon ñiniŋgambay ak, Gor biynimb tep yand aŋgiy, niŋiyiŋ nep mindeniŋgamb aŋgyak.”

10 Gor chinup per tap yiŋ ñiy, keñmaŋgiy ñiy gip ak; nimbip tap yiŋ kuŋay yimb ñiniŋgamb. Pen nuk gek jakrep geniŋgamb, nimb diy gunap biynimb bilok ñem mey, tep yimb ginimuŋ rek ayip. 11 Nimbip per gek, tap nimb kuŋaynep mindek, monmon ñemb rek ayiniŋgamb ak mey; tap ñiyiŋg mindem, chin dand amiy biynimb gunap ñon, Gor nup yimb ak dand araniŋgambay.

¹²⁻¹³Gor nup chin̄giy, direp giniᅇgambim kun ak, biynimb gok sek direp giniᅇgambim mey; Gor nup yimb ak dand aranyiᅇg angniᅇgambay, “Kiyk Krays minim tep ak pisnep diy, chinup monmon ñiy, biynimb okok kuyip monmon ñiy gipay ak; nip tep yimb aspun angniᅇgambay.” ¹⁴Pen Gor nimbip simb niᅇiy direp yimb gip rek niᅇiy, gos kiyk am nimbip kom kom gek tep gakniᅇ, Gor nup angniᅇ mindeniᅇgambay.

¹⁵Pen chinup Ñi tep yimb nuk ak monmon yokek apiy kumak ak; nup yimb dand aranjun.

Pol, Yip Yenen Kun Apay Angak

10 ¹⁻²Yand Pol nimbip aspiyn: Krays Biyomb chin ak, bi tep biynimb angdep ak mindip rek, yip nembnemb gem, nimbip minim kilis ak ma angnim! Biynimb nimb gunap yip apay, “Nuk ap chin yip mindiy; bi sayn, minim ma angip ak pen; am par okok mindiy, minj anep tikiy, minim kilis giy angip apay.” Pen minim ar bap apay, “Pol biynimb yikop mankumb biy ker gok niᅇbay rek nep niᅇiy angip apay.” ³Niᅇind apay; mankumb biy mindpun ak pen, biynimb mankumb biy ker gok gos niᅇbay rek niᅇiy, minim kilis penpen angep ar ak ma apun. ⁴Chim yakam chin diy penpen gipun ak, Gor kilis sek mindip ak mey, Seytan boᅇg kilis gayip gok am gi timey gon, biynimb pen angniᅇgiy rek ma ayip. ⁵Gor nup gosimb ak kirgiy, yimb key dand aranyiᅇ gipay ak pen; Gor chinup kond mindakniᅇ minim angon, kinjeᅇ kiyk bap ma mindip ak niᅇbay. ⁶Kun ak nimb Koriyn biynimb Krays angip rek giy mey; kisen biynimb nup alemb alemb ñimbay gok, angrep gem niᅇniᅇgiy.

⁷Nimb gunap yip niᅇem, bi yikop rek ayip ak pen; niᅇrep ginimimb. Nimb Krays ker mindpim rek chin kunep mindpun. ⁸Biyomb ak nep chinup woᅇg angayek, biynimb gok kuyip kond mindpun apiyn ak, yimb nuk key dand aranjap angniᅇgambim ak pen, yip nambiᅇ ma giniᅇgamb. Pen woᅇg anggek gipun kun ak; biynimb gok kuyip angem apyap pikniᅇgiy angiy ma angak; kuyip angem mindrep giniᅇgiy angiy chinup anggek gipun. ⁹Pen nimbip minj tikyokpiyn gok niᅇiy, piriknimimb angiy ma yokpiyn. ¹⁰Biynimb gunap yip apay, “Nuk par okok mindiy, minj nep tikyokiy, minim kilis yimb angip ak pen; biy apek niᅇon, biyomb minim apay rek ma angip apay.” ¹¹Pen biynimb kun apay kun gok niᅇmindeniᅇgiy. Chin amjakiy, ar bap key ma giniᅇgambun; par akniy mindiy, minj tikiy apun rek nep giniᅇgambun.

¹²Pen biynimb, chin yomb yimb mindpun apay kun gok; kiyk yomb mindpay akan, chin yomb mindpun angiy piyow niᅇun angon, chinup jel ma gip. Kiyk apay, “Chin gipun ar ak nep yipund gip, chin nep biynimb tep yimb; biynimb maᅇgiysek kayan rek mindpay apay.” Apay kun ak mindrep giy ma apay. ¹³Pen chin Gor woᅇg ak tep gipun akan, minim kun ak rek angniᅇ, biynimb gunap woᅇg geyak, chin ap yikop ar koyon

ginuk ak sek, ma aŋgningambun; Gor chinup bilok ayek key gipun ak nep aŋgningambun. ¹⁴Nimbip nen, Gor chinup aŋgek, chin nind nep amiy minim tep aŋgñonuk; nup ker mindpim minim ak aŋgningambun. ¹⁵Biynimb gunap miñmon nimb ak am kiñiŋ giy woŋg gey, chin ar okok apiy, miñmon biy Gor woŋg ak chin gipun aŋgiy ma aŋgningambun. Pen chinup tep giniŋgamb ak; nimb Gor nup chiŋgrep yimb giy mey, woŋg chinup aŋgayak ak, nimb yip gon amrep giniŋgamb. ¹⁶Kisen mey nimbip silawiy, am miñmon nind ma aŋgñiyak kondor okok amiy, kuyip minim tep ak aŋgñiniŋgambun. Pen chin bi gunap gipay rek, yimb yomb dun aŋgiy, bi gunap woŋg giniŋgambay ar ak chin gipun aŋgiy, ma aŋgningambun; key gipun ak nep aŋgningambun. ¹⁷Pen Baybol buk ak tikiy aŋgyak, “Biynimb miñmiñ giniŋg, Biyomb ak kuyip gek minim ma mindip ak niŋiy, miñmiñ giniŋgiy aŋgyak.” ¹⁸Yenen: Biyomb chin ak biynimb key tep giniŋgamb gok ma diniŋgamb; biynimb nuk niŋek minim ma mindip gok diniŋgamb.

Bi Jiysis Minim Aspun Aŋgiy Yesek Apay Gok

11 ¹Yand sakiy minim rek aŋgningayn ak pen, minim kiñiŋ mindakniŋ aŋgning gispiyn. ²Gor nimbip wasemb ayip rek, yand kunep gipiyn. Nimbip biyn piñ mindrep giy bi nokom diniŋg gek, dam bi kun ak nup ñinik. Bi kun ak mey Krays. ³Pen yand pirikpiyn ak; nind yimb yimb siyŋ ak tom gek, Yiyp niŋdak rek, biynimb gunap nimbip kunep minim yesek gok aŋg dand amey, gos kiyk niŋbay rek niŋiy, Krays nup gosimb nokom niŋiy direp gipim ak, kirginimimb rek ayip. ⁴Yenen: nimb kuyip tip ñem, Jiysis chin ak nup minim aŋgñimbun ak ma apay; Jiysis bap key rek minim ak aŋgñey, monmon dispim. Pen Gor Kawnan ak sek, minim tep ak sek kunep, key kisenimb bap rek ak dispim.

⁵Pen yand niŋen, bi Jiysis minim dand amemb nimbik kun gok biyomb; yand bi tam okok rek ma mindpiyn. ⁶Minim kiyk ak, yindik yimb apay ak pen, yand apiyn rek niŋrep giy ma apay. Chin nimbip per niŋrep giy nep, aŋgñimbun ak niŋrep gipim!

⁷Pen nimbip Gor minim tep aŋgñinik ak; bi gunap gipay rek, pen tap gunap ñinimimb aŋgiy ma aŋgnik. Ginik kun ak, yip bi tam okok bap aŋgiy niŋbim? ⁸Nimbip woŋg giniŋg genik, Gor ker mindpay biynimb tiŋgoŋ gunap, yip maniy tap gunap ñiyak. ⁹Nimb yip mindenik ñin ak, tap nimbip bap ma dinik; mam ay Masedoniya nimb wiyak gok nep, tap yip yerip tikdak gok dap ñiyak. Kisen kunep, tap nimbip gunap ma aŋgningayn. ¹⁰Nimb Akaya propens mindpim gok, tap nimbip ma dipiyn rek, aŋgyiŋ nep mindeniŋgayn. Krays binuk mindpiyn rek, niŋind yimb aspiyn. ¹¹Pen apiyn kun ak, nimbip yiruk niŋiy ma aspiyn. Gor niŋimb: nimbip wasemb yimb aypiyn.

¹²Pen maniy tap nimbip gok ma nep don, bi Jiysis minim dand amemb mindpun aŋgiy nimbip tom gipay gok, chin gipun rek nep gipay aŋgiy,

anġningiy rek ma ayniġgamb. ¹³⁻¹⁴Bi minim yesek anġnġmbay kun gok, Jiyis wong gispun anġiy tom gipay ak; niġind kun gipay. Yenen: ñin gunap nop kiyk Seytan kunep; Gor enjol melik tep nuk bap rek silok ay wip. ¹⁵Kun ak bi nup wong gipay gok, bi suġ-tep rek silok ay apey, gos yomb ma niġjun. Pen gipay kun ak, Gor kuyip yerer giniġgamb ak, giy diniġgambay.

Pol Gor Wong Giyng Miker Dak

¹⁶Yand tip ak aspiyn: nimb gunap yip bi sakiy anġiy, ma niġnimimb. Pen yip bi sakiy anġiy niġniġgambim ak, yip kirgem; bi sakiy gok, yimb kiyk key dand aranġmbay rek minim gunap anġnim. ¹⁷Pen minim kun biy Biyomb ak gos ñimb rek ma anġniġ gispiyn; bi sakiy ayek, yimb key dand aranġmbay rek anġniġ gispiyn. ¹⁸Bi gunap gos key niġiy, yimb kiyk key dand aranġmbay ak, yand kunep ginim. ¹⁹Yenen: nimb gos niġrep yimb gipim rek, bi sakiy gok minim anġey, nimbip yiruk ma gip. ²⁰Bi yesek anġiy, nimbip lipiġ dand amiy, maniy tap nimbip gok diyiġ, nimbip monmon giyng, yimb yomb dipay gok; nimbip tep gip. ²¹Pen yand bi tam okok mindpiyn ak, nimb yip mindiy, tap nimbip gunap ma dinik. Pen sakiy minim rek aspiyn ak, yimb kiyk key dand aranġmbay rek, yand kunep giniġgayn. ²²Kiyk Hiybriw biynimb? Yand kunep Hiybriw bap. Kiyk Yisrel biynimb? Yand kunep Yisrel bap. Kiyk Ebrahim kiñiġ bap? Yand kunep Ebrahim kiñiġ ak mindpiyn. ²³Kiyk Krays nup wong gipay? Yand bi sakiy rek yimb key dand aranġpiyn ak pen; kiyk yand wong kilis giy, miker ar keykey diyiyn rek ma gipay. Yip ñin kuñaynep, kalambis ayak. Ñin kuñaynep tapin pikyak. Ñin kuñaynep kumdam namb ay winik. ²⁴Jiwda kay yip ñin keykey anep mamind ak, miñ diy yinj ñin jiwiy, andikiy jiy piskind ak pikyak. ²⁵Rom kay kunep yip ñin keykey omiñal nokom, kur diy pikyak. Ñin bap biynimb kuñaynep, yip kamb jiw pikyak. Siyip tanġenik; ñin keykey minek omiñal nokom, siyip ak pisnep paġ pikek amdak. Siyip timey gak ñin kun gok, minek bap tap day band bap chichiy diy, ñiġ kas ar ak aran apyan gi minden minden, pumb saġind amiy, kisyim apiy, miñmon yowak. ²⁶Per miñmon kumemb rek namb okok taġyng, ñiġ wilik gok tikpiyn; bi biynimb pikay tap kuyip siy dipay namb okok tapiyn; biynimb yand Jiwda yipund giy akañ, Jiwda mer namb okok girapiyn; biynimb mam ay apay ak pen, Krays ker ma mindpay namb okok akañ, dawin yomb okok akañ, solwara namb okok akañ, saġiy okok akañ giranġiy per mey kumbiyn. ²⁷Wong kosyam giy, wisin ma kiniy, chech ma mindiy, keñmanġiy ma mindiy, yiwan giy, ñiġ nen giy, takil giy gip. ²⁸Pen miker bap mey, biynimb Krays ker mindpay miñmon keykey okok, mindrep gispay akañ anġiy gos yomb ak niġbiyn. ²⁹Krays biynimb nuk gunap apyap pikniġ gey, gos yomb yimb niġbiyn. Pen biynimb gunap kuyip gey apyap pikpay ak niġen timey yimb gip.

³⁰Biyimb gunap chin biynimb yomb kalrimey mindpun anġiy, tep gakniġ yimb dand aranimbay ak pen; yand miñ ar kun ak ma giniġgayn; bi tep ma mindpiyn rek, tep gakniġ mindeniġgayn. ³¹Jiysis Krays Nop Gor, Biyomb pernep yimb dand aranemb ak, yand yesek ma apiyn ak niġimb. ³²Yand dawin yomb Damaskas mindenik, kiyn Areytas binuk anġayek Damaskas kond mindyiġip ak, yip kalambis ayin anġiy, poliys nuk gok anġek, kinjeŋram okok maŋgiyseki tikyak. ³³Kun giyak ak pen; mam chin gunap yip di wand yomb miġan ak ay, miñ tiwningiy, kamb wariy kus kus giyak wiyndiw miġan ak lipiŋ yokey, am am man biyanġ amiy, pirik amninik.

Pol Day Niġak Minim Ak Anġnak

12 ¹Yimb yand key dand aranen tep ma giniġgamb ak pen; Biyomb chin ak, bi bap nup gek day niġak minim ak, anġniġ anġniġgayn. ²Wosrey bi yand niġep rek Krays nup chiŋrep gak bap, Gor dand miñmon tep semb biyoŋ amnak. Gak kun ak, miñiy simiy yin yin ayip wanjrem piskind ak. Pen bi kun ak mumbwak sek kun biyoŋ amnak akaŋ, mumbwak kirgiy Kawnan nep amnak akaŋ, ma niġbiyn; Gor nep niġimb. ³Minim ar kun anep tip aspiyn. Nup dand miñmon tep biyoŋ amnak ak pen; mumbwak sek akaŋ, mumbwak kirgiy kawnan nep amnak akaŋ, ma niġbiyn; Gor nuk nep niġimb. ⁴Pen kun biyoŋ amiy, key yimb mindek ak niġak. Key yimb gak kun ak, biynimb anġnemb rek ma ayak. ⁵Bi bap nup gak kun ak rek anġniġgayn ak pen; yimb key dand aranbinip ak, tep ma gipkop. Minim yand key anġniġ; bi kilis ma mindiy, kosyam mindpiyn rek nep anġniġgayn. ⁶Yimb key dand aranemb minim gunap ma mindek ma aspiyn. Pen biynimb gunap yip niġiy, ak bi tep key mindip anġey, yip tep ma gipkop. Yip tep gip ak, gipiyn gipiyn rek niġiy akaŋ, minim apiyn rek niġiy, bi yerip rek mindpiyn ak key niġniġiy.

⁷Yenen: Gor yip dand biyoŋ amnak kun ak, biynimb gunap ma niġyak, yand nep niġnik rek, yimb yand key dand aranim rek ayek, Gor yip tap miker ñemb bap ñimb. Tap kun ak Seytan ker apiy, yip ñiw rek piŋjkiyġ mindip. ⁸Biyomb ak nup ñin omiŋal nokom anġniġiy, yip kun gisap rek ma ginimuŋ anġnik ak pen; ⁹yip anġak, “Biyimb gok, keynep mindiy, mindrep giniġiy rek ma ayip ak niġrep giy mey; kuyip simb niġiy kond mindnikniġ mindeniġgambay. Kun ak gos yomb ma niġnimin anġak.” Kun anġak ak, yimb key dand aranemb ak yip tep ma gip. Yip tep gip ak mey: bi tep ma mindpiyn rek anġniġ minden, yip direp giyiġ mindonimuŋ. ¹⁰Kun ak Krays ker mindpiyn rek; yip anġjiwpay akaŋ, timey gipay akaŋ, kosyam mindiy mindrep ma gipiyn akaŋ, yip yerer gek, yand miñmiñ yimb gipiyn. Yenen kilis yand ma mindip ñin ak, Gor yip kond mindrep gip ak mey, kilis yimb giy mindenim rek ayip.

Nimbip Koriyn Kay Direp Gipiyn Anġak

¹¹Pen yand bi sakiy rek yimb key dand aranbiyn ak, nimb nep gem kun gipiyn. Yip diy, minim tep gunap apkip ak pen; yip kirgiy, bi gunap

kuyip diy, minim kuyip ak dipim. Yand bi tam okok mindpiyn ak pen; kiyk biyomb yand bi sikoy angyi ma niñbiyn. ¹²Nimb yip mindiy, nimbip direp yimb giy, chin bi Jiysis minim dand amemb gok gipun rek, gon amek, Gor tap gep magep gok keykey gek niñbik. ¹³Kun ak biynimb Krays ker mindipay wikan gunap kuyip, ginik ginik rek nimbip kunep gipiyn ak pen; ar nokom bap nep key gipiyn rek ayip. Ar kun ak mey: tap yip tikdak gok, yip ñim angyi ma angnik. Nimb niñem; nimbip timey ginik mey, ar kun ak rek ayip. Pen nimbip tep ma ginik kun ak, niñiy kirginimimb.

¹⁴Nimbip nind ñin omiñal am niñnik, miñiy tip ak niniñg gispiyn. Tap nimbip bap diniñg ma niniñgayn; nimbip nen angyi niniñgayn. Nop nonim sikop tap dayrep giy mey, ñapan nuk sikop kuyip yimañgiypay. Pen ñapan kiyk gok, nop nonim sikop kuyip kun ma gipay. ¹⁵Kun ak gos yand niñbiyn ak, nimbip nen minim tep ak angnii dand amiy, maniy tap yand gok mañgiysek yokdiniñgayn akañ, kumniñgayn ak; minim ma mindip. Pen nimbip wasemb yimb aypiyn ak niñiy, yip pen niñem yiruk yiruk gip? ¹⁶Akañ pen, maniy tap chinup gok ma dip rek, kisen yesek anğ dand amiy, tap chinup gok diniñgamb angyi niñbim? ¹⁷Nimbip bi akay rek yokiy, tap nimbip gok windin windin ay dinik? ¹⁸Taytas nup yokniñg, mam chin bap sek nimbip ker yoknik. Pen yand niñbiyn: Taytas tap nimbip gunap yesek angyi ma dak. Nuk ar bap key ma giniñgamb; yand gipiyn ar ak nep giniñgamb.

¹⁹Pen mam ay sikop. Pol bi gok minim aspay ak, yimb chinup ma apyownimuj angyi aspay angniniñgambim ak pen; chin Krays ker mindiy, Gor niñmindakniñ, nimb Gor nup nep chingrep ginimimb angyi aspun. ²⁰Yand pirikiypiyn ak; am nimbip niñningayn ñin ak, gipim rek niñen, yip tep ma giniñgamb. Penpen angyi, miluk niñiy, tap gok chin nep dinjun angyi, monmon giy, minim timey angyi, biynimb gok kuyip minim diy, yimb key dand araniy, asik keykey ay gi mindenimimb rek ayip. ²¹Pen gos bap niñbiyn ak; kayañ amiy niñningayn; nimb gunap yenen kun gipun angyi ma kirgiy, biyn siy bi siy giy, monmon ginep mindeniñgambim. Giniñgambim kun ak Gor niñimb angyi, yand bi tam okok rek mindiy, nambiñ gakniñ, nimbip nen siy anğ mindeniñgayn.

13 ¹Yand nimbip am ñin omiñal niñnik; miñiy pen tip ak niniñg gispiyn. Baybol buk ak tikiy angyak, “Biynimb gunap timey gipay angeniñgiy, biynimb omiñal akañ, omiñal nokom rek niñmindey giniñgamb ak; niñind apay angyi, minim angem tep giniñgamb angyak.” ²Kun ak menikarik namb sijak nimbip am niñiy, biynimb timey giyak gok kuyip giniñgayn rek, anğrep giy winik. Miñiy tip ak biynimb nind timey giyak gok sek, miñiy timey gispay gok sek aspiyn; amjakiy kuyip simb ma niñningayn. ³Pen nimb Pol Krays yip mindip akañ, mer angyi niñbim gok, niñrep ginimimb. Krays tap gunap miñmon nimbip okok

gek niñbik ak, nuk bi yikop mer; nuk Bi kalrimey yimb. ⁴Nuk bi yikop rek tikiy, mon kiros bak biyoñ kumak ak pen; nuk Gor yip mindip rek, tip ak tikjakiy kim mindip. Kun ak rek, chin bi minim nup dand amemb mindpun gok. Bi yikop rek mindpun ak pen; Gor kilis ak dipun rek, nimbip aᅅgiy woᅅg gipun.

⁵Kun ak nimb key gos niñem amiy apiy gek, Krays nup chingipun akaᅅ, mer aᅅgiy niñnimimb. Pen yand niñbiyn ak, Krays nimb yip nep mindip. Akaᅅ pen, nimb gunap gos kun ak niñem amiy apiy gek, nup ker ma mindpim ak niñbim. ⁶Pen yip tep gip ak, Gor nimbip gos tep ñek mey; yand bi yerip rek mindpiyn ak niñrep giniᅅgambim. ⁷Chin nimbip nen, Gor nup aᅅgniᅅiy apun, “Kuyip kond mindenimin, timey ar ak ma giniᅅgiy apun.” Pen nup aᅅgniᅅbun kun ak; mindrep gem yimb chinup aranimoᅅ aᅅgiy, ma aᅅgniᅅbun. Yimb chin yowniᅅgamb ak tap yikop; Gor niñek mindrep giniᅅgambim ak tap yomb yimb. ⁸Pen Gor nup woᅅg giñimbun rek, minim yipul yimb nuk ak yomb ginimoᅅ ar ak giniᅅgambun; yesek ar ak ma giniᅅgambun. ⁹Nimb Gor nup chingrep giy mindem, chin amjakiy, nimbip niñon tep gek, minim kilis ma aᅅgjun. Kun ak Gor nup aᅅgniᅅiy, kuyip kond mindenimin, nip chingrep yimb giniᅅgiy apun. ¹⁰Ar kun anep, yand paryomb akniy mindiy, nimbip minj tikyoksiyiyn. Nimb minj kun ak niñiy, Gor nup chingrep giy mindem mey, yand amjakiy, minim kilis aᅅgniᅅ niñbiyn ak kirginiᅅgayn. Gor yip aᅅgek woᅅg nup gipiyn rek, minim kilis gunap aᅅgniᅅ aᅅgniᅅgayn. Pen yip woᅅg aᅅgayak kun ak, nimbip apyap pikim aᅅgiy ma aᅅgniᅅgayn; mindrep gim aᅅgiy aᅅgniᅅgayn.

¹¹Mam ay sikop. Miñiy minim aᅅgiwning, “Nimb mindem” aspiyn. Minim aᅅgen asaw ak niñiy, Gor nup chingrep giy, minim aᅅ ar nokom ay, mindrep ginimimb. Kun gem mey, Biyomb biynimb wasemb ay direp gip ak, nimb yip nep mindeniᅅgamb. ¹²Nimbip tep gakniᅅ, mam ay Krays ker mindpay gunap yip, ñin piksaknimimb.

¹³Biynimb Gor ker mindpay akniy nimbip, “Mindpim?” apay.

¹⁴Biyomb chin Jiysis Krays bi biynimb simb niñiy dep ak, gach nimbip ak wiykyokyᅅng nep mindonimoᅅ. Nop Gor nimbip wasemb ayeᅅg nep mindonimoᅅ. Kawnan nuk ak nimb yip nep mindonimoᅅ.